

虛受堂文集

虛受堂文集卷八

長沙 王先謙 益吾

吏部左侍郎楊公傳

公姓楊氏諱永斌字壽廷雲南昆明縣人康熙三十八年舉人四十一年援例發廣西補臨桂縣知縣以廉能愛民稱遭喪去職百姓送者號泣塞路服闋補直隸阜平署平山改大城六十一年用捕內監陳進忠事落職民泣籲巡撫保畱疏上雍正元年二月 詔復官先是 一日 上顧內侍籍大城者問曰縣令楊某居官善否 對曰不善其爲政嚴有犯必懲人皆自危 上於是知

公果賢遂有是命七月遷涿州知州居二年上問
公於總督李維鈞維鈞以迂執對上問故對曰鹽典
商規不受斃盜不以聞上曰信如是良吏也數日擢
貴州威甯府知府召見溫語嘉獎威甯介滇蜀與
烏蒙鎮雄鄰二土府夷人不靖公至以奉檄分界單騎
入烏蒙夷巢撫慰之而密遣人僞市賈分道圖其地形
歸鄂爾泰公總督雲貴公進謁鄂公曰上任君威甯
責望重君知之乎公因言二土酋不懲終爲邊患出懷
中圖進鄂公喜問計公曰烏蒙祿萬鍾年幼諸土司未
附圖之今其時矣請毋曠日勞師但發威甯畢節兵壓

境馳書論以川督劾萬鍾不職奉 命質審萬鍾出宅
不問否則兵疾臨之烏蒙平鎮雄勢孤必乞降不一月
二府定矣鄂公從之召萬鍾不至令游擊哈元生及公
進討萬鍾遁烏蒙遂降鎮雄隴慶侯亦請納土凡三十
三日而兵罷六年米貼土婦陸氏叛官軍四集公語總
統哈元生曰賊以冕山巴補爲後路事急則渡金沙江
而逸當以重兵扼其前奇兵越江攻之迺可殲也元生
從之克獲如其策鄂公疏薦公可大用遷貴東道改糧
驛道署按察使朝臣有爲畝稅軍田議者部檄下公上
書鄂公言議者以天下軍田皆官田給屯軍耕非民業

比且畝稅銀五錢不爲苛不知軍田糧以屯租爲準已數倍於民田民轉相授受與交易民田無異又畝稅之是重科也民必不服且前代設軍田邊方尤多黔省軍田稅以數十萬計有司征比踰正供當多事之秋更爲民增剝膚之患驅之爲亂耳鄂公卽以其議聞而黔滇軍田竝得免七年擢湖南布政使始至湖南方以軍田計畝丈未定胥吏四出公援例請皆獲免焉九年改廣東十年署巡撫旋實授粵地多山雖瘠可耕濱海斥鹵可藝稻民俗逐末趨網罟利公檄州縣覈曠土得六千八百餘頃因疏言瘠田雖產穀少若多墾數十萬畝卽

可獲數十萬石。歲歉獲薄，亦資養人，免飢驅爲盜。宜多方勸導，以盡地利。上嘉納焉。於是墾田百十八萬餘畝，以贍無業者。方公陸辭時，上以粵中文武大吏抵梧門戶，黨援未絕。諄諭及之，公坦懷接人，虛己集事。僚屬翕服，宦習遂變。獲劇盜余猊，陳美倫數十輩，寘之法。論曲江乳源諸崗，猺歸化而劫竊之患絕。以西洋天主堂習爲奸，驅之澳門，令番舶不得泊省城下，煽愚民西人數十年，不近廣東省城。自公始也。乾隆元年兼署兩廣總督，二年三月調湖北巡撫，兼署湖廣總督。九月調江蘇，三年五月，上以公自陳衰老，召署禮部左侍

郎十月授吏部右侍郎四年三月因病乞休 命原品
致仕五年卒年七十一公受 知兩朝平時 寵賚不
可勝紀自粵入 覲 召對 賜坐及茶宴 御書
御馬鞍轡各一乘自 午門出時人榮之孫滄官浙江
按察使後裔以文學科第世其家勿絕其六世姪孫基
善以祖徙湖南爲黔陽拔貢篤行博學與余友善乞爲
其家傳

前史官王先謙曰方公以鴻漸之翼沈抑下僚內侍不
足道彼總督者迺不知潔身除暴爲良吏非 天子聖
明烏能伸其志乎公卒鄂公志墓推爲滇黔第一人共

事久知公深也烏蒙今爲雲南昭通府鎮雄爲州米貼
今永善縣云

河南汝州知州楊公傳

公姓楊氏諱兆李字仲燮一字夢蓮先世有諱辛者明初從黔國公沐英征雲南授武略將軍自江西甯都徙昆明爲縣人世襲千戶十傳而至縣學生寓乾生子二長永斌歷任廣東湖北江蘇巡撫終吏部右侍郎爲雍乾間名臣大學士伯文端鄂爾泰公銘其墓所稱陸山楊公者也次景斌廩膳生景斌生文賜湖南澧州嘉山鎮巡檢署澧州州判遷安徽安慶府照磨引疾乞休家黔陽爲縣人是爲公祖文賜生洪太學生以孝聞生子二長兆杏嘉慶戊午舉人湖北通山縣知縣次卽公也

出後從父潤乾隆甲寅，恩科舉人嘉慶六年，大挑知縣發河南誓於神而行，歷署太康，獲嘉，臨漳，考城，滑濟，有政聲。大兵之剿，教匪李文成於滑也，鞠俘囚多所全活。襄滑衛軍局無苟得，同僚誚讓不爲動。十九年補泌陽。楊某者，憎其女夫貧，悔婚，構訟。公廉得實而女母懼女死，已竊遣歸。其夫公備彩輿，助匭具，命其夫婦人署成禮，揚旌鼓吹，騎導而歸。豫人爲傳奇演之。調鹿邑。值水災，請粟廣賑，道無流殍。遷陝州知州。道光六年，因事落職。八年，巡撫疏言楊兆李官，豫有聲，百姓愛戴，請入貲復官報。可署光州，信陽，補汝州，歷署汝甯，歸德。

府知府公所至城池壇廟書院義學名山勝蹟有廢必舉嘗以爲化民之道尤在轉移其心能知古人所以足重然後思自拔於今人經籍所載非儒者末由考而知至於前徽遺列表而章之歲時鄉里展慕流連其入人心尤至故於往代賢哲節義里居祠墓務崇大寢顯赫赫照耳目又援武進陽湖例請於大吏奏建節孝總坊期年得旌者萬三千有奇十八年引疾歸卒年七十九初公母雲氏嗜橘病亟醫請屏之母卒公終身不食橘子積煦貢生分發河南通判歷署鄭州禹州知州有廉能名大學士王文恪公鼎奉命治河聞其賢薦於

朝孫基善拔貢生候選教諭垣善同知職銜墉善國
子監典簿

前史官王先謙曰澈浦嚴公正基言公官河南名與栗
恭勤公毓美埒而栗公亦稱公儼於漢魯恭卓茂然仕
竟不進人能宏道無如命何知道者豈以位高下爲顯
晦哉

梁剛節公傳

公姓梁氏諱洪勝字華彬湖南長沙人也縣人丁銳義
募勇勦賊武昌公隸麾下以斬級功由六品軍功敘把
總從克武昌漢陽擢守備加都司銜賊踞蘄州黃泥阪
官軍攻之賊不出公請於銳義約諸軍退單騎至賊營
前肆詈以誘之偽丞相韋朝綱帥羣賊徑趨公公馳馬
斬悍賊三擒朝綱羣賊趨救公亟斫朝綱朝綱回斫公
負重創力持之不釋羣賊前公復殪其魁餘相顧莫敢
近官軍自山嶺呼而下賊大潰平其七壘還師斬朝綱
一軍稱神勇擢都司加遊擊銜充營官銳義殉難三河

公突圍出以所部屬都統多隆阿公卻舒城援賊擢遊擊破援賊桐城功最擢參將加副將銜破安慶援賊擢副將賞果勇巴圖魯號復桐城宿松黃梅加總兵銜隨多隆阿剿擒匪河南解陝西商南圍以總兵記名簡放湖北巡撫嚴樹森素聞其勇檄令統一軍駐漢口擒賊數躡湖北圍王桐柏成大吉於霸山公赴援一日夜馳二百里未至霸山賊解圍去公追擊樊城卻之又躡之光化賊走河南時賊鋒銳甚官軍屢敗襄樊獲安公之力也公自領軍聞警卽赴未嘗待大府檄調檄至如其計滋重大府顧公旣以勇名益剽悍自喜無紀律

賊既入河南而粵匪賴汶洸自漢中出與之合竄天門
據阜市眾號數十萬公孤軍轉戰大敗於花台被圍七
晝夜僅以三百人免諸軍無捄者總督官文劾樹森落
職欲殺公檄其軍駐蘄水賊大至公力戰卻之追至羅
田解都統富森保之圍重賂官文左右官文更愛之奏
公忠勇無兩益其軍專倚以辦賊賊踞黃陂之街埠公
禦之輕騎摩賊壘賊夜伏隘攢刺之墜馬親兵二皆死
其軍弗知也時同治五年正月四日年三十有二事
聞照提督例從優議卹 予諡剛節 賞騎都尉兼一
雲騎尉世職

前史官王先謙曰余甲子從公天門花台之敗賊追官軍急公持矛立馬橋上以過軍賊愕眙久之退得免者數百人及禦賊斬水日與數十善騎者挑戰以勝反余謂公此非大將事也答曰命在天卽大將不死耶余聞人言自公微時卽輕財上義通任俠性儻募亡檢一日入酒肆擲巨金案上徧揖肆中客曰今日諸君盡醉酒直悉洪勝代償矣在軍日不殺賊不快及戰短衣橫矛馬上背刀手火彈火繩繆臂見賊輒大笑伺其至然繩擲彈遠矛近刀當者輒靡重自負卒以是蹶云詩曰趙趙武夫公侯干城其公之謂乎濟之以整暇古良將莫

過矣。

黃忠壯公傳

公姓黃氏諱潤昌字劭坤湖南湘潭人也家貧甚從兄負薪讀書日數千字有文名爲縣廩生粵寇踞江南公應曾貞幹聘爲軍諮時官軍圍太湖潤昌建議太湖地險固與潛山賊犄角不易攻不如分兵小池驛擊援賊陳玉成玉成敗兩縣城賊必遁伏而邀之蔑不殲矣從之皆克獲如其策賊據安慶不下懷甯人程學啟久陷賊中尤驍桀公獲賊諜廉知學啟可用入其營說之三反學啟降眾議殺之公力救與同臥起飲食學啟感奮戰敗賊賊磔其妻子學啟戰逾力盡破城外石壘同復

安慶走玉成著績江蘇以提督殉節湖州諡忠烈公成
之也於是皖南三山賊熾甚曾公國藩欲招之降莫敢
往以屬公公單騎至賊巢開示利害賊皆感動歸者數
萬人公遂成一軍與諸軍復繁昌南陵太平蕪湖及魯
港金柱關東梁山進攻金陵扼三汊河護宿軍運道婁
破賊克雨花臺九洑洲僞天堡地堡二城力戰復金陵
歷保至 記名按察使 賞花翎勳勇巴圖魯號 賜
獎武牌湖南巡撫劉公崑募勇守長沙緝會匪以公統
之遣入貴州與席寶田會勦苗賊公督兵入清溪設水
師通糧運攻雞鳴關焦溪兩路口克之復鎮遠府衛焚

數十苗砦議攻施秉黃平通黔滇驛路會四川援兵寶
田遣提督榮維善帥十三營與道員鄧子垣赴之公遂
進復施秉破白洗大甕谷隴降苗賊數千至小甕谷隴
地險狹有黃飄白堡諸隘苗設三卡以待縱榮軍過公
繼至木石槍礮雨集公血戰不得出中礮死榮鄧二軍
皆覆同治八年三月二十二日也事 聞奉 旨照巡
撫例賜卹 予諡忠壯本籍及死事地方建專祠事蹟
宣付史館世襲騎都尉兼一雲騎尉公治軍嚴而有恩
將弁陣沒哭奠而歸骨其家軍行無擾黔楚閒民皆德
之年三十有九

史臣曰方楚軍既復施秉公頗持重欲稍休息觀敵釁而榮鄧二軍促之維善尤猛驚主客相持莫能統壹用是喪師或以輕進爲公罪非其實也公以二千入黔三月之內復城三毀苗砦數十前此援黔諸軍未嘗有也功雖不成然已勤矣自軍興以來士徒步起軍伍取富貴不可勝計公獨雍然有古君子風議論時事多可採不竟其用悲夫

蔣果敏公家傳

公姓蔣氏諱益澧字薌泉湖南湘鄉人也幼孤貧長負奇氣不偶流俗咸豐三年曾文正公國藩治鄉兵湖南公甫冠從焉破粵寇岳州敘從九品羅忠節公澤南偉公能四年增募湘勇以公將左營從復湖北黃梅晉縣丞進規九江破賊白水港小池口五年賊竄江西公從羅公赴援復弋陽縣廣信府義甯州城晉知縣胡文忠公林翼疏請羅公回援湖北公從克崇陽蒲圻晉同知直隸州 賞花翎從圍攻武昌省城迭破賊洪山漢陽門沙湖紫金山小龜山麥門橋分軍自將馳擊敗葛店

援賊克武昌縣省圍堅完公功爲多晉知府母憂歸七年廣西賊熾乞援於湖南巡撫駱文忠公秉章檄公統軍赴之破賊全州復興安靈川晉道員 賞巴圖魯號艇賊李文茂踞柳州分黨陷平樂公逆擊走之八年公自蘇橋進師別由雒容陸路昇船入洛垢江徑襲柳州賊以爲下游悉破大驚出拒斬馘數千文茂宵遁遂復府城 賞布政使銜署廣西按察使復慶遠 記名按察使赴湖南募勇潯州賊乘虛上犯聞公歸卽遁九年授按察使旋晉布政使公在軍分甘共苦得士死力蘊智含剛眾莫能測潮州勇目謝楊王昌十數輩屯省城

驕恣不法。賊屢犯省會。楊等暗通賊。莫肯效用。公請於
巡撫治具。宴集酒半。悉禽斬之。駢誅其黨。與賊酋石達
開自湖南竄廣西。公慮平樂空虛。統軍往賊。已攻城。奮
擊敗之。賊走灌陽。徑犯桂林。公疾馳還省。遣水軍奪賊
木筏。絕其東竄。與道員蕭啟江等更番剿擊賊。竄江西
桂林。以安公壯年盛氣。抗論兵事於同僚。多陵忽學政
李載熙。嫉之。以賊犯省城。摭事疏劾。降道員十年。賀縣
賊酋陳金缸分擾昭平。平樂。公連破之。畫眉嶺公會墟
大灣嶺復賀縣。賞還布政使銜。進克下郢。堅巢賊走
潯州。以按察使記名。十一年復授按察使。會廣東水

軍克潯州賊黨悉平復布政使原官 賞三代一品封
典時浙江淪陷巡撫左文襄公宗棠疏請公統部兵援
浙當一路 詔授浙江布政使同治元年閏八月抵衢
州遣將高連陞克壽昌拔蘭谿西裘家堰七大壘羅埠
賊內應夾擊破之進攻湯溪大小數十戰殺賊數萬二
年復湯溪龍游金華府城別將克紹興蘭谿浙東平
賞珍物交部優敘公渡江而西圍富陽屢破賊援剗堅
壘數十克其城偪杭州十五里而營三年盡破城外卡
壘降海甯桐鄉拔嘉興城外賊壘杭賊勢孤三月克杭
州 賞黃馬褂雲騎尉世職公分軍克德清石門會蘇

軍克湖州賊首洪瑱就禽 上以公平浙功最晉騎

都尉世職左公督師入閩 詔公護理巡撫公與左公
相得甚每復城得便宜置長吏節軍食羨餘活窮黎既
莅杭省益請於大府撫傷振乏首建府縣學復書院豐
給優禮以徠生徒免塵稅減田賦吏兵占民舍者還之
市肆訢訢巷陌充溢溫台諸部盜出沒誅其魁傑禽湖
州槍船首惡餘編籍互保港汊晏然行旅無警數十年
未有也既攝撫篆勅貢院開科舉隍淤湖葑成就疏豁
造舟運濟百貨流衍海塘鞏致斥鹵可歎杭人德之於
其去多泣送者五年 詔赴廣東辦理軍務二月授巡

撫疏言太平關稅康熙中巡撫監收乾隆時改隸南韶連道近歲收不如額半耗於苞苴臣與各官署得銀四萬餘兩請裁禁復舊制肇慶五坑客民與土人械鬪累年踞寨戕官公討平之投誠者處之高廉諸府賀貴諸縣別爲客籍二十人赴試入學一名亂遂已與總督瑞麟不協以病乞休 優詔不許尋爲瑞麟所劾事下閩浙總督吳棠劾公任事徑情未能推求例案鑄三級劄赴左公軍營七年授山西按察使病免十三年 召入覲公力疾入都十二月卒於蕭寺年四十二 詔復原官照巡撫例賜卹政績付史館尋 賜祭葬 予諡果

敏浙江建祠子德椿 賞刑部主事

前史官王先謙曰公以孤寒拔起閩里與其鄉先達意氣許與如雲龍之相從剡亂扶傾無往不利遂以廓清區宇名光竹帛何其盛也然公才氣蓋世不能僴俛徇時遭同列齟齬再擠而隊之功名之際危機隱伏同人則亨詎不信哉其聰明仁愛出於天性隨宜措正動合大體勞來安輯之功浙人到今稱之世徒美其武略測之淺矣

贈知府銜署惠州海防通判高明縣知縣許公家傳
公姓許氏諱鏞身字彥直鵬山其自號浙江仁和人本
富春沈姓其祖於明嘉靖時有育於中表戚家者感其
德受氏焉曾祖鉞乾隆戊午舉人任甘肅廣東州縣終
理徭同知祖學韓本生祖學范乾隆壬辰進士任雲南
貴州州縣終刑部員外郎父乃穀道光辛巳 恩科舉
人甘肅敦煌縣知縣三世 贈光祿大夫兵部尙書乃
穀子五公其長也道光二十四年由監生入貲爲知縣
選廣東高明權高要躬行廉勤不爲身章法成令舉兩
竟交頌用緝盜功擢知州咸豐三年權惠州海防通判

通判故駐碣石衛攝惠潮二郡閒瀕海控險與總兵同城而理時巨盜穴金陵東南摧陷粵中姦猖蠶屯遙相應和燹火之警徧於全省會垣戒嚴朝夕不弛大府鄙怯詭名鎮靜擁兵周衛宅不一問屬城驚憂倚濟令長人自爲衛土自爲守或瀕危而幸全已陷而旋復事定一闕白大府而已公慷慨蘊智略旣生長世家練精時務又久任典城習吏事益踔厲鋒發務以國爲憂民生苛痛軍政堅窳諄諄勤勤靡不究圖推迹亂原感詫時事瞑目拊膺以夜繼日甫到官土寇陷惠來密邇於衛總兵帥眾出公申警備禦督察比閭奸宄遁逃毗伍

大驪三點會土寇起海豐殘官窟城民請濟師總兵難
之公曰海豐與衛唇齒脫賊久據城爲根本鈔掠旁近
禍立及我今乘彼未定用攻代防揀豈在人實惟自全
總兵以爲然部署偕進戰連捷賊棄城奔躡迹急擊剗
太平圍賊巢初公幼觀劇見明總兵周忠武遇吉甯武
關殉難事義形於色母徐太夫人問曰兒豈欲效周將
軍乎應聲曰此兒志也母其許我矣及擊賊海豐登縣
城南五里山山有方飯亭者宋丞相文天祥駐軍於此
方飯爲元兵追襲後人閔忠建此亭也公繫馬入亭賦
詩言志未而月而有煙墩墟之變海豐餘寇旣遁又合

歸善土寇擾歸善三多祝墟百姓遮公乞援公率練勇
民團疾馳與賊遇破之九州鄉進駐煙墩墟日暮矣賊
出不意乘夜薄營官軍未及成列公督眾搏戰賊益大
集公力竭遂遇害咸豐四年十一月四日也幕賓張受
經僕人劉彩書吏黃恩從死事 聞 賜卹如例同治
元年 允署兩廣總督晏端書請 贈知府銜原籍殉
難地方建祠從死諸人附祀光緒十四年公子之軫宰
江陰與余數過從具悉公遺事乞爲其家傳自公會祖
逮之軫眞爲牧令凡五世

前史官王先謙曰許氏以科名仕宦雄於浙最著者吏

部尙書文恪公乃普江蘇巡撫乃釗公弟今兵部尙書
軍機大臣庚身然浙人尤豔稱公與公族叔祖南河候
補州同學陸以爲許氏榮莫先焉學陸咸豐十年粵寇
陷杭時罵賊死難者也

皮先生家傳

先生諱炳字文舫湖南善化人其先宋資政殿大學士
龍榮居醴陵爲望族裔孫文通遷攸之水頭十二世孫
東山明中葉官某邑知縣以名宦祀鄉賢遷長沙占籍
善化五世孫昶 國朝康熙初遷縣東鄉子孫世居之
四傳至先生高祖殿選以進士出知山西滿城縣曾祖
志遠縣學生祖學海副貢生保靖訓導父繩直 贈中
憲大夫子三先生其仲幼慧十一歲通諸經受知郝文
端公騫藻補弟子員食廩餼咸豐辛亥歲始舉於鄉年
垂五十矣不復以進取爲意一赴會試歸不出軍興後

鹽釐局開當事重其名招之再三辭家無宿儲充然自得授徒會城著錄多才俊晚主講平江醴陵兩書院士爭趨赴齋舍至不能容六十後恆鄉居問字求詩文者踵接於門先生暇則芒屨竹杖與田夫野老酬接述古近事爲勸戒解釋爭忿十餘年里無質公庭者平生不加人詞色然遇有過則直折之令改迺已故人樂與之親而莫不肅然以敬皮氏遷長沙後族眾散處先生建祠修譜嚴立教約罔敢越犯鄉有善舉必贊成之蓋先生自少逮老不爲夸毗之言苟合之行自其施於身與教其子孫若族姓及其門人一以敦厚樸實爲宗生平

無顯顯可見事迹其德量淵淳宏深常若不可測先謙
幼得見先生稍長從遊且久辭而遠出歸而又數修謁
也於先生作止語默數十年厯厯懸心目初若無甚異
徐而求之當世賢豪所爲亦未有能及者初先生以妻
孫淑人卒意甚傷悼年未四十不更娶曰吾有子矣其
子宗瀚跪請置侍婢終不許卒年七十五

贊曰古之所謂鄉先生沒而可祭於社者豈必以其位
哉若吾皮先生庶當之無愧色乎 朝廷興行教化豈
惟公卿大夫是賴鄉人士絃歌太平蒙被 聖澤宜有
助焉得文行兼美如先生數千百輩落落布天下陶成

俊良而矜式里黨治平之效可立見矣宗瀚以名進士官戶部主事先生孫曾皆能繼家學其長孫積軍伐官江蘇知縣孰謂興起不由積累耶宗瀚抵書先謙銘幽有文子其爲傳先謙謂先生之德宜有述謹論次之不惟皮氏之傳亦使後之人聞而勸也

龍孝子傳

龍孝子江西永新人名光閣字紫台先世在明有顯者
孝子幼喪母盡禮如成人家貧服賈養父父晚病痿痺
孝子夜必數起負以溲邴寒不懈父沒言未嘗不泣鄉
里宴集有述其父事者孝子輒嗚咽流涕咸豐二年年
七十五矣邁疾親友來問偶語及父大哭家人奔集疑
有變已乃知之親友莫不歎息卒年八十一前數日猶
感念先人號泣數四云初孝子父寢疾命孝子曰吾數
十年溺苦於學終以困躓命也我死汝當勸諸子繼志
事李某者吾所敬宜往師之及詣李已館他所孝子大

勸李驚問故孝子曰念先人遺命是以勸耳李爲憮然
孝子卒教諸子起江起瀾籍府縣學起濤成進士以知
縣卽用官湖南有政聲同治乙亥孝子得旌於朝

前史官王先謙曰起濤會試出余門爲余述孝子事甚
具夫人心不誠壹則不能有功於人事況欲以全其天
性難矣如孝子之爲可謂誠壹者也今人論孝恆侈奇
節略庸行孝子之於親生則竭力沒則泣思迫耄老垂
屬纊而不渝其初其庸也其不謂之奇與

張節母李孺人家傳

孺人李氏鄞縣張編修嘉祿母也年十七歸愚菴贈君
生嘉祿及二女贈君疾革指嘉祿謂孺人曰三世單丁
賴茲一綫汝勉撫之言訖而暝時嘉祿十一歲二女數
歲耳家貧甚孺人命嘉祿從師讀一日嘉祿廢學孺人
挈之跪贈君畫像前曰兒向頗嗜書今父柩在堂迺如
此他日何所望且撻且泣嘉祿亦泣白哀悔自是教課
愈嚴晨興入塾師則督之逮夕歸室已則續之祖先享
祀媼族餽問米鹽衣履修脯之資仰孺人十指辨色而
作丙夜而不休如有年嘉祿學成爲閭里名師孺人

疾戒毋令嘉祿聞嘉祿知而求醫立方孺人輒卻之曰
死生有命藥能爲功邪同治五年五月卒年三十九後
二年以節孝旌嘉祿貴贈孺人孺人在時爲嘉祿
聘婦未娶望嘉祿爲諸生亦不及見也

前史官王先謙曰編修語余少時讀姚氏冊記蕭山汪
進士輝祖兩節母事當時進士求文至數百篇徵姚氏
文至今天下誰知蕭山汪氏兩節母者因泣述其節母
事而求余文自聖皇宰世禮教旁洽天下孝子貞婦
眾矣苟不遇善爲文如姚氏輩則姓氏不能播於人人
之口者何可勝道然綱常之理自有其不做者存不恃

文字之末也矧余文不足爲節母重邪編修文粹而行
敦篤將導揚前美而章節母之德於無窮余姑爲之傳
以俟焉

周宜人傳

宜人余氏名肅娟湖南長沙人曾祖正煥嘉慶辛酉進士翰林院編修江西鹽法道祖崇本雲南澂江府知府父思訓道光癸卯科本省解元今湖北咸豐縣知縣宜人其長女也生而婉惠暨長清靜自守居室中若無人焉者余氏既三世顯宦大治第郡城東深堂曲室重門洞開笙歌酒譙申旦不絕婦女衣裙帶舄密組重繡都麗迷目每出僕婦十數輩衣綺縠從觀者辟易歎嗒戚里轉相慕效而宜人塵視之妝飾樸素有儒家風自其祖母張太恭人工詩諸姑姊姪輩並有才秀嫻詠事丹

青羣從聚處。誇競藝能。以爲笑樂。宜人獨懷若霜雪。見者謂其丰骨特異。云年二十有一。歸周自菴先生之次子。淪蕃房室。和樂尤得。姑歡姑卒。從先生入都。綜家事。整肅有法。家人敬憚之。然得大體。不爲苛刻。值翁小極。躬進藥餌。定視不闕。先生歎曰。賢孝哉。他日願女得婦。亦如女矣。同治五年十一月九日。沒於京師。年二十五。先生痛思至切。命予傳焉。

贊曰。予以戚郇。得亟見宜人。其屏當內外。有勝男子。絕不自表暴。及居帷闈。治女紅。不聞刀尺聲。何靚慎若此。耶。今婦人。暱房中之好。隳內則之義。及其沒也。所親爲

求達官貴人之文以諛飾其名字匪惟失實益之媿焉
予之作傳乃出翁命曷以然哉范蔚宗云端操有蹤幽
閒有容宜人之謂與

章貞女傳

貞女桐城章氏父啟榮候補同知貞女生而婉靜幼讀列女傳慕申女宋其姬之爲人字布政司理問張秀子宗翰光緒十四年二月宗翰卒時女年二十一聞欲殉父母敦諭則請赴夫家以守不許長跪哭泣願終死截髮自明父母知不可奪送女張氏抱木主成禮撫嗣子慈愛篤至宗翰有母在女事之至孝侍疾割腕肉和藥進迫疾篤夜焚香告天祈身代及姑沒匍匐哀號幾無生人理見者莫不哀憐也年二十六旌於朝

前史官王先謙曰余昔過大通荷葉洲客李爰得家啟

榮方佐爰得經紀家事啟榮質直好義喜古書遺事相
與論上下荷葉間爲大通河合江處江自李陽河中分
爲南江禹貢三江之一卽漢書分江水也又言咸同間
皖中寇亂官民忠殉婦女義烈輒感激憤發若身其事
今其女迺如是其純懿殆賦自天性者邪

故明督師太傅武英殿大學士兵部尙書史忠正公傳
公諱可法字憲之道鄰其自號河南祥符史氏籍直隸
大興世錦衣百戶祖應元舉於鄉官黃平知縣有惠政
父從直母氏尹公少以孝聞性孤耿有志略左公光斗
視學畿輔一日微行入古寺見一生伏案臥文甫成草
閱畢取貂覆之詢寺僧知公名及試呈卷注視久之面
署第一召入使拜夫人曰吾諸兒碌碌他日繼吾志事
者生也畱館署中每公餘衡論時事相與感憤皆裂舉
崇禎元年戊辰進士授西安推官遷戶部主事歷員外
郎郎中八年遷右參議分守池州太平其秋總理侍郎

盧象昇大舉討賊改公副使分巡安慶池州監江北軍
屢破賊初當事以皖爲南都上游議設兵備遏寇南下
眾莫肯往公奮然請行至皖築城練兵畫戰守策皖以
無警象昇改督宣大代以王家禎未幾復代以熊文燦
專撫賊賊益逞朝議增設撫臣爲豫楚聲援開府於六
廷推公十年擢右僉都御史巡撫安慶廬州等處公至
六建六安營捐奉修城興學校懲姦宄改點差賑饑民
奏免被災田租州有蝗公夜禱焚香盡三炷達曙如是
彌月其掾曰勞乎公曰余爲秀才時月僅七夜眠服官
後情矣何言勞恐罔濟負吾民耳麾下劉小全馬如龍

作亂帥百人噪於軍夜三鼓城中火起亂者入署窺公
朱衣坐堂上乘燭仗劍神光照人咸驚竄去明日討平
之公短小面黑目有光性精敏事鉅細親裁視聽批答
同時雜進靡有遺失士不飽不先食未授衣不先御以
故得人死力臨敵先進所向無堅桐黃舒六閒裘延幾
千里賊屢入屢創降其酋順天王十二年以父憂去官
朝廷遣中涓伺於涿州啟其篋銀杯二奠章三十二軸
而已報聞帝爲動容有奪情議公固辭十四年服闋起
戶部右侍郎兼右僉都御史總督漕運巡撫鳳陽淮安
揚州風紀清肅濬南河漕政大釐拜南京兵部尙書參

贊機務因武備久弛奏行更新八事十七年三月李自成犯燕京公誓師勤王渡江抵浦口聞京城陷烈皇帝殉社稷大慟頭觸柱流血縞衣發喪會南都議立君尙書張慎言等移牒公曰福王由崧神宗孫倫序當立而有不可七貪淫酗酒不孝虐下不讀書干預有司也潞王常澆神宗姪賢明可立公然之鳳陽總督馬士英潛與阮大鍼計議立福王公告以七不可而士英已與黃得功劉良佐劉澤清高傑發兵送福王至儀真於是公等迎王監國五月拜公禮部尙書兼東閣大學士與士英高宏圖並命士英仍督師鳳陽公仍掌兵部事乃定

京營如北都故事侍衛錦衣衛諸軍入伍操練錦衣東西兩司房及南北兩鎮撫司不備設以杜告密安人心時士英冀入相命下大怒以公書奏而擁兵入覲拜表卽行公遂自請督師出鎮淮陽十五日王卽位公陞辭加太子太保改兵部尙書武英殿大學士而士英以是日入直於是江南士民伏闕上書曰伏見陛下初臨監國擢史可法東閣大學士仍管部務萬姓歡呼頌陛下知人善任先帝用可法南樞實天牖聖心畱佐陛下中興之業南都積弛未易蒙安樞臣以無欲知人以不倦舉政經營一載漸可驅策今陛下奠安南服鼓銳北征

諸將所服逆賊所畏無逾可法聞出代督師眾心皇惑
淮陽雖急果別遣督臣使可法居中調度則兵糧無憂
可法自行雖身任督師而中樞必更成局則戰守紛擾
機會一失局勢盡移此江南士民所以奔走號呼伏闕
哀籲者也書奏王不省公奉命祭泗鳳二陵畢上疏曰
陛下踐阼初祇謁孝陵哭泣盡哀道路感動若躬謁二
陵見泗鳳蒿萊滿目雞犬無聲當益悲憤願愼終如始
惕厲無怠二祖列宗將默佑之若晏處東南不思遠略
賢奸無辨威斷不靈老成投簪豪傑裹足祖宗怨恫天
命潛移東南一隅未可保也王嘉答之時分江北爲四

鎮以澤清傑良佐得功轄之澤清等縱兵大掠轉相攻
公往解悉聽命傑攻揚州聞公至懼旦日朝帳中汗浹
背公接以溫語奏屯其眾瓜州乃開府揚州闢館招士
屢奏請餉士英靳不與公疏趣之因言邇者人才消耗
仕途日淆由名心勝而實意荒議論多而成功少今事
勢更非昔比必專主討賊復仇舍籌兵籌餉無議論舍
治兵治餉無人才並言東南闕員不少擇吏爲先銓選
法窮不能不改爲徵辟請倣保舉法通行撫按司道九
卿科道等有才膽過人者不拘資格各舉一人送京赴
軍前效用酌補守令二年考滿平升善地三年考選優

擢京曹有靖亂恢疆功能殊異者立以節鉞京堂用又
言北都諸臣南還從逆者宜重處僞命未污身被刑拷
者置勿問隱避北方徘徊後至者許戴罪赴軍前酌用
毋絕其南歸心廷議從之時 大清已定燕京攝政王
遺書招公公復書數千言不少屈會和議不成十月公
令傑帥師北出遣人屯田開封爲經略中原計諸鎮分
汛地自王家營而北至宿遷最險要公自守之築壘緣
河南岸時李自成走陝西公奏言自三月以來大仇在
目一矢未加昔晉之東也君臣日圖中原僅保江左宋
之南也君臣盡力楚蜀僅保臨安葢偏安者恢復之退

步。未。有。志。在。偏。安。而。能。自。立。者。大。變。之。初。黎。庶。灑。泣。薦。紳。悲。哀。痛。憤。相。乘。猶。有。朝。氣。今。則。兵。驕。餉。絀。文。恬。武。嬉。暮。氣。至。矣。河。上。之。防。百。未。經。理。復。仇。之。師。不。及。關。陝。討。賊。之。詔。不。達。燕。齊。君。父。之。仇。似。置。度。外。夫。將。能。克。敵。者。氣。也。君。能。御。將。者。志。也。君。志。不。奮。則。士。氣。不。作。夏。少。康。不。忘。出。竄。之。辱。漢。光。武。不。忘。熱。薪。之。時。臣。願。陛。下。爲。少。康。光。武。不。願。左。右。在。位。以。晉。元。宋。高。之。說。進。也。請。速。發。討。賊。詔。責。臣。與。諸。鎮。悉。簡。精。銳。直。指。秦。關。懸。上。爵。以。待。有。功。假。便。宜。而。責。成。效。絲。綸。之。布。痛。切。淋。漓。庶。海。內。忠。義。聞。而。感。憤。國。家。慘。邁。大。變。陛。下。嗣。位。不。同。先。朝。諸。臣。

但有罪當誅無功足錄請慎重爵祿專待功臣庶猛將
武夫有所激厲兵苦無糧搜括不可行勸輸復難繼請
不急之工程可已之繁費朝夕之燕衍左右之進獻一
切報罷卽事關典禮亦宜節省蓋賊一日未滅雖有深
宮曲房錦衣玉食豈能安享必念念在復仇雪恥振舉
朝之精神萃萬方之物力併於選將練兵一事庶人心
可鼓天意可回公每繕疏循環諷誦聲與淚俱聞者感
泣比 大清兵下邳宿公飛章報士英曰彼欲敘防河
將士功耳置之而諸鎮逡巡無進師意數相侵奪明年
是爲 大清順治之二年河上告警公請以良佐得功

率師扼潁壽傑進兵歸徐傑至睢州爲許定國所殺部
兵大亂屠州旁近二百里殆盡變聞公歎曰中原不可
爲矣遂如徐州定其軍傑軍還大梁以南皆不守而士
英方忌公威名加故中允衛允文兵部右侍郎總督興
平軍以奪其權二月公還揚州未至得功襲興平軍城
中大懼 公遣官講解引去時大兵已取山東河南北
徧淮南四月公移軍泗州護祖陵將行左良玉稱兵犯
闕王手書詔公入援渡江抵燕子磯得功已敗良玉軍
公乃趨天長檄諸將救盱眙而盱眙降 大清泗州援
將侯方巖全軍沒公一日夜奔還揚州城中訛傳許定

國兵將至殲高氏部曲悉斬關出舟楫一空公檄各鎮
兵無至者二十日 大清兵大至屯班竹園明日總兵
李棲鳳監軍副使高岐鳳以其軍降城中勢益孤公作
書寄母妻且曰死葬 我高皇帝陵側 大清兵薄城
下豫親王前後七致書說降公不復啟視投之水二十
五日 大兵攻城急多死者王親督攻城陷公自刎不
殊一參將擁出小東門公大呼曰我史督師也遂被執
至城樓上王雅重公引坐勸降以洪承疇爲比公曰我
此時止辦一死頭可斷身不可屈但揚城百萬生靈幸
勿殺戮王百方勸諭不從毅然就死時乙酉四月二十

五日也僚屬從死者甚眾揚城屠公爲督師行不張蓋
食不重味夏不箴冬不裘寢不解衣年四十餘無子其
妻請置妾太息曰王事方殷敢爲似續計乎素善飲數
斗不亂在軍絕飲歲除遺文牒至夜半倦索酒庖人報
殺肉分給將士無可佐者乃取鹽豉下之嘗子處或言
宜警備公曰命在天遇敵數月不寢使將士番休而自
坐幄幕外擇健卒十令二人蹲踞背倚之漏鼓移則更
代每寒夜起立振衣裳冰霜迸落有聲或勸少休泣曰
吾上恐負朝廷下恐愧吾師也公死覓遺骸不得踰年
家人以袍笏招魂葬揚州郭外梅花嶺後四方弄兵者

多假名號以行故時謂不死公無子遺言以副將史德威後弟可程可模可程崇禎十六年進士改庶吉士京師陷降賊賊敗南歸公請寘之理王特宥之可模早世公死後可模妻李氏奉公母妻居金陵浙人厲韶伯軀貌類公冒其名集亡命數百破巢縣入無爲州提督某擒之眾莫辨召母妻及李氏出始吐實而李氏有色爲眾所窺會金聲桓反豫章禁旅往討駐金陵有聶三者媚少宰某豔李氏強委禽焉遣婢拒之不聽詈之又不可聽須臾婢奉盤進聶曰奉夫人命恣若所爲視之髮髻耳鼻各一血淋漓滿盤中聶倉皇馳去乾隆四十一年

乙未。上特恩賜公諡忠正。御製題像詩并公復攝政王書摹於梅花嶺祠壁。

前史官王先謙曰余誦公文章慨然想見其識略悲其志之窮而言不見用也天眷興朝公卽專明柄不必有濟況束縛使不得騁耶曩讀欽定明史不詳公仕

明事蹟由易代之後採訪難周雖有遺微莫爲收恤逮天語親褒然後勝國孤臣炳於雲漢公之不朽固自有在而昭代教忠之典邁千古矣因覽公遺集援據諸書補爲之傳俾後有考焉

劉觀察傳

觀察江西人其先有隱德仍世孝友郭侍郎嵩燾爲之
記所稱武甯劉氏者也篤行弗耀逮觀察始大其門以
進士官戶部主事改湖南道員歷任大府皆推敬之嘗
備兵衡永再權鹽法糧儲媵媵益謹爲時所稱武員某
被劾察辦觀察奉檄點驗營額某以萬金爲託峻拒之
堯保甲事冬夜出巡往來風雪中天明歸寢以爲常盜
賊屏息民安其居皆言劉公不解於位人所難能其出
自至誠尤不可及世俗好長短人語及觀察必曰潔清
自守恭儉慈惠人也相顧無異詞年將八十有幼子女

四人腰腳輕健其長子熙臺以知府官於皖迎養欲往
爲余言黃山瀟霍之勝將以暇日往遊焉

贊曰余與觀察交久固要余爲作傳余曰凡生而爲傳
者類多抑塞轆軻志概不見於時君名位德業足自表
襮何用汲汲觀察笑曰欲得君文爲重耳噫余文何足
重觀察然竊幸余文之託觀察以傳也觀察字定夫鎮
其名

歐陽礪東先生傳 集句體

歐陽礪原名紹洛字念祖一字礪東湖南新化人父基

文字同周乾隆乙酉拔貢銓就州判以親老乞歸授徒

自給性方潔天才挺拔詩文操筆立就為時所重 寶慶府志

文學 早逝 鄧顯鶴南村詩話 輅九歲補縣學生即好吟詠所遇

窮惡蹤迹落落莫無常師於詩若有天授家貧甚資傭力

以養 沅湘耆舊集小序 博學多通書過目終身不忘 陶文毅礪東詩鈔序

乾隆甲寅舉於鄉 耆舊集序 頻上春官不得意南走粵北為

蘄代山海關之遊 陶序 性野逸不修威儀衣履敝垢岸然

公卿大人中劇談豪飲旁若無人人亦無與忤者後閉

門不復出躬耕奉母非力不食於人世升沈寵辱泊如

也者舊集序一時名公雅重之或不遠數千里殷勤致禮不

至籜冠草履吟嘯清泉白石間陶序牆宇自峻與人少可

曾文正鄧湘皋墓表南豐譚光祐守寶慶學使歛程恩澤按試至

郡二人皆名宿始一出與雙清亭之會好事者至繪為

圖府志文學傳垂老卜築邑城東遁迹沈冥兀兀無其語者

李洽夜談追錄自序其詩灑氣流轉含章內映精思壯采搏結無

迹沈道寬欄東集跋語然持律矜嚴鄧墓表嘗言作詩務苦吟戒自

恕或屢改而不安則竟削之又云作詩當自寫其胸中

之天不期而與古合所謂非有受於人忽自得之今人

過一地遇一人必作一詩豈吾胸中之詩哉既挾所業

出與天下士大夫接所至折服名流少能頡頏者舊集序與

寶山毛嶽生東鄉吳嵩梁相知善嵩梁詩才罕匹嘗謂

人曰僕畏礪東不敢與敵也臨川樂鈞未識輅寄贈以

詩錢塘吳清鵬以詩求論定稱輅為韓蘇而後一人服

膺如此夜談追錄同邑訓導鄧顯鶴少輅十歲兄事之者舊集序

每有篇什輒就輅與相違覆鄧墓表輅鈎覈瑕疵不少寬

假顯鶴卒無以易其言也者舊集序道光二十一年卒據夜談追

錄李序年七十五府志箸有礪東詩鈔十卷安化陶澍彙行

之序陶又手定詩三卷畀顯鶴顯鶴為刻之沅湘耆舊集

者舊輅於詩窮極幽微偶有論斷必求通古人之詞較

其得失析其毫釐多人所未發同邑舉人李洽筆存之

為夜談追錄二卷郭嵩燾夜談追錄序子棻字迪來邑廩生者舊集序

亦能詩府志文學傳奇情幽思不愧名父之子者舊集序又有歐

子三卷恢奇俶詭無一常語府志早卒顯鶴刻其詩入資

江沅湘兩耆舊集中者舊集序

毛青垣先生傳

集句體

毛國翰字大宗號青垣湖南長沙人性純孝幼讀書穎悟強記能闇誦佩文韻府不遺一字尤工詩赴縣試見知於縣令陳光照其子沅奇國翰文願內交招之不往親至其家結歡而去補縣學生鄉試屢黜

毛氏家傳

長沙城北有黑麋峯水西南流入於湘其水會謂之麋湖口國翰卜宅當山水間因名曰麋園屏居其中益肆力於詩以抒其侘傺無聊往往多幽憂之思悽苦之響云

長白裕壯

毅公麋園詩鈔序

與鄞沈道寬為文字交道寬宰鄞縣聘國翰

教其子十餘年道寬權知茶陵州虧帑數千金被劾勒

追國翰赴鄆稱貸人以道寬廉惠又見國翰勇於為義

咸感奮競運致錢穀不一月而集事道寬得復官走謝

國翰國翰曰公澤在鄆其邑人急父母之難吾何力之

有家傳湖廣總督裕泰招致莫府數年道光二十六年丙

午以微疾沒於署年七十五參裕序及家傳著有麋園詩鈔八

卷天顯紀事三十二卷青湘樓傳奇若干卷家傳其詩五

古清越醇雅出入陶謝江鮑間七古雄盪有奇氣約束

矜貴不涉奔放近體步唐賢無沾滯之音佻縵之氣新

夏廷楨廉裕泰既經紀其喪歸葬長沙復編梓其詩序

之曰國翰為詩鏡心研神朝吟而夕琢月成而歲易人

知好與否舉弗顧可謂勤篤者也集中如松徑含風雨
秋山見性情巖花畱雨色風絮落春陰獨往吟詩對修
竹同來入坐惟秋岑楚蜀地形江口斷乾坤秋色雨邊
來諸聯最爲傑出它類此者尙多夫觀詩如遊山澤卽
以楚論衡山洞庭之高深人不待遊而知之而麋峯麋
湖介在其間有侷侷自異者又非善遊者不知也余故
用李中碧雲集序例摘佳句著之簡端爲讀麋園詩者

導先路云

裕序

始祖子泉公傳

王氏世居江東遷楚者始子泉公其先自東晉以功名
顯代爲名族而譜帙闕略不言其世系支派不敢據以
爲信謹述自遷祖始公諱霑子泉其字江甯府上元縣
朱家巷人也明正德間進士官國子監出判湖南岳州
府明敏仁恕決獄多平反吏民頌之任滿將遷乞休遊
湖湘閒公旣潛榮利又嫉江南習尙豪侈占數長沙居
城北福善坊側時倭寇擾浙趙文華以工部尙書視師
江淮搜括財物東南民重困公聞之歎曰天下事可知
矣吾幸避湘上得安廬舍長子孫爲樂故鄉當柰何家

居爲善益力曰士苟存心濟物何分出處耶將卒遺命
子舉曰自嚴氏父子專政楊沈輩以身殉去歲又杖戍
吳時來等祖宗培植善類一敗於靖難再壞於議禮今
滋甚矣未有士氣不振而國脈永久者人之云亡邦國
殄瘁斯郭林宗痛哭之秋也汝慎毋爲官舉涕泣受教
年六十妣吳氏

五世祖若水公傳

公諱慎修字若水行之公五子也少穎悟好學補縣學生家饒貲而無嗣諸兄欲爲置妾固卻之樂善好施然不飯僧修佛事晚益強健悉與產兄子餘田若干畝納長沙縣學爲族人入學補廩出貢費而謝諸勸立後者曰子於吾者未必不失業基弗棄有後矣年六十五無疾卒妣鄧氏後公十日合葬焉今族人補弟子員登科第者必以祀祖日拜公墓

贊曰公四兄子孫皆蕃衍然不盡有名稱公無子而吾邑庠序中之稱頌公者至今弗衰也田納於學爲官乾

沒更索費嘉慶丁卯族爭而復之道光庚戌碑於學田
始定嗟乎田雖學入迺吾王氏子孫所宜世守者官於
學者二三年輒代而利此而爭者踵相接也此又世道
之衰而公所不及料者矣

先伯兄會廷府君行狀

吾家世居省城祖墓多在城東南數里所獨高祖龍溪
府君遠葬潞塘河桃花港阿公嶺下歲癸丑避寇亂潞
塘河而先伯兄卒葬於其鄉去高祖墓不一里自移家
至卒甫月餘若爲侍高祖來者倘亦有數存耶嗚呼悲
已先大夫生兄七年大伯父沒遺命後兄方四五歲時
吾母授字盈數就外傳舍業嬉者數年先大夫課之已
都荒其學乃鍵戶日夜督責背書偶誤以紙斜籤其字
至再計點畫倍咎之血痕常滿袴吾母爲緩頰先大夫
怒曰吾以貧甚廢學兒學更不成何以對先人兄弟又

長無師誰教者王氏之澤將自此斬耶乃持兄願吾母相嚮哭兄伏母懷亦哭各失聲兄性頗鈍由此研精覃思學日進八年而大成先大夫覽其文喜曰吾他日可以見祖宗地下也乃命赴縣試得前列丁祖母憂服甫除賊犯長沙圍解後學政案臨觀風上取未院試避於鄉而死矣嗚呼傷哉兄長身玉立頭角嶄然見者皆許爲遠大器性淡於榮利然以先大夫教誨之切期望之奢常懼不一博科名爲堂上戚課試不得高等夜臥以足擊榻上震震作響塵語歎詫聲徹四壁讀益勤苦遂得便血疾迄不愈教仲兄先謙誘掖獎勸無不至每日

溫經書令復解明日又取解者隨所指辨詰之反復通
貫無遺義乃已閒則令默記故事日必足十比夜前仲
兄侍坐講通鑑立先謙於側歲爲常故先謙未學爲文
而習史事已頗多值家計日蹙鄉居饔飧每不給先大
夫憂形於色一日兄長跪曰大人何憂兒兄弟且四人
以次成長設皆不遇而爲童子師猶能歲獲束修養二
老矧吾家祖澤厚庭訓嚴豈無一亢宗者何憂爲先大
夫爲蹶然命酒極歡當崎嶇奔竄時未嘗令仲兄先謙
一日廢學卒之前夜猶招至牀前以舜何人也子何人
也題命爲文傷哉兄自爲大伯母後曲意承順雖遇萬

難無纖毫怨抑色秉先大夫訓持家不惡而嚴平生以
忠信待人伉直無所依違尤不喜浮蕩子有友人食洋
菸戒之至垂涕卒後平素相往來者時偶語歎惜曰今
安再得如王會廷者而友之嗚呼兄之立身本末亦可
概見矣先謙當兄沒時甫十二齡言貌性情至今厯厯
若繪顧墓碑闕如自以譚陋不足表彰先兄潛德又懼
事久而易墜也爰狀其實以待當世能文者而求之兄
諱先和字會廷道光九年己丑五月二日生卒以咸豐
三年六月二十九日年二十五妻吳氏女佩祖吾姊女
也嫂撫如其女遂女焉卒後以先謙官 馳贈奉直大

夫翰林院編修加四級同懷弟先謙謹狀

先仲兄敬吾府君行狀

嗚呼吾伯兄卒之四年而仲兄相繼逝家難之劇未有若此者也念兄生平之志行不可湮而弗彰則亟思爲狀以求當世賢人之文章垂諸不朽屢執筆泫然復輟歲辛未先謙將奉太夫人北上擇吉徧謁辭祖先之墓最後至仲兄墓門自卒後墓再修至是而華表石闌已爲牛礪其角而奔壤斷折矣歛歔泣下久之歸以告從弟先運曰是宜培願以煩弟且予欲表兄墓久矣京師文章藪求而歸將并屬弟樹之及來京人事閒阻復不果爲狀而先運累以書來促乃卒成之兄諱先惠字敬

吾先贈君次子也方吾母姪兄家貧甚冬月常著夏布
中衣故兄生而在弱四齡不能步稍長口吃性內慧觀
書若不求甚解而默識功最多贈君命從先伯兄讀一
日讀不卽熟贈君亂撻之伯兄跪抱之泣贈君怒並撻
伯兄唾曰護而弟撻他日當奈何伯兄曰限兒五年授
弟讀不成立者請受撻如今日旣乃試爲論事之文
古近體試律詩各成章以呈贈君贈君撫其頂喜極淚
墮曰幾失吾子自贈君督諸兒急不聽出遊妄交雖伯
兄往來者必從里邵密詢其文行不可則何其來自出
謝之曰毋溷我兒以故先謙等年十四五不識街巷東

西非年節不得過親戚家至是始命兄從伯兄閒出遊
息曰兩兒謹愿吾無慮也伯兄卒之明年兄以府試冠
首補縣學生又明年廩於庠每試前列名噪甚又二年
先謙補縣學生稍得從兄後出謁親戚長者皆歎曰
此兩兒王氏積累報也不知費載之幾斗心血矣載之
贈君字也自粵匪躪東南楚南當賊衝屢警辛亥後再
停鄉試丁巳補行時與吾家往還者皆以得解賀兄自
學政張海門知長沙府倉劭坪兩先生至學師以次厚
相期許敦勉兄亦重自負將入闈疾作奮衣行畢三試
出不十日卒矣榜放薦未售房考官彭公極意惋惜伴

來召願得一見師友戚里多慟哭城中人聞者識不識
皆謂長沙失一好秀才矣悲乎傷哉兄生而敦厚不妄
言笑對人若處子事父母曲盡怡柔伯兄卒哀不自己
而問親必強歡笑課兩弟竭盡心力及先謙入學兄喜
甚攜季弟禮吾手告先謙曰吾兩人幸稍自立弟又英
敏他日必有成吾見近世偷薄子兄若弟有數百貫錢
輒生睚眦議分析是誠何心願與兩弟約得白頭其大
被不恨矣痛伯兄早卽世耳因相對嗚咽時先恭尙幼
及長以兄言告禮吾聞之未嘗不仰而慕俛而泣也試
之四日再入闈疾漸亟先謙力阻之泣曰吾豈以一第

爲重輕哉。顧天下大亂，今歲鄉試幾不行。更三年，知復何似。吾輩有老親，勢不能投筆取功名。家門已不振，親意責望厚，不從此中乞生活，行且窮餓死，瘠而獲雋，天也不幸而身殉文，亦天也。天其佑我，遂入回憶。先謙至試院，兄坐明遠樓下，相待先謙，負囊襪被送，兄歸號舍，臥守其傍，煎藥熟呼兄起，面慘淡無人色，張目視先謙，淚潏潏墮藥盃中，已復臥。再煎再起，飲聞扃門，先謙乃悽然歸。已舍門啟，趨兄所，扶以出。情事歷歷在目前，而十六年矣，能不悲哉！能不悲哉！兄生以道光十七年丁

酉十二月二十七日卒，以咸豐七年八月二十四日年

二十一葬長沙南門外師古坡以弟先謙官 貤贈奉

直大夫翰林院編修加四級妻楊氏同治十一年壬申
十月初十日同懷弟先謙謹狀

季弟禮吾行狀

自。余。喪。季。弟。而。余。母。年。六。十。有。四。矣。又。憂。傷。多。疾。不。得。已。迎。養。以。北。浮。長。江。沂。運。河。自。濟。甯。登。陸。至。德。州。舟。達。通。州。而。入。都。余。家。老。者。幼。者。疾。者。親。戚。貧。者。皆。率。以。行。歷。程。五。千。爲。日。二。百。四。十。寒。暑。異。時。水。土。異。宜。風。濤。盜。賊。車。馬。沉。瘁。飲。食。衣。服。不。時。不。適。余。母。幾。病。而。後。安。者。數。焉。至。都。米。鹽。瑣。屑。之。務。平。日。未。嘗。過。問。者。舉。集。於。余。無。一。人。助。境。日。窮。身。日。困。而。余。自。是。不。可。一。息。離。母。他。適。凡。以。余。弟。之。喪。之。故。弟。所。繫。於。吾。家。道。者。重。矣。哉。弟。功。名。既。未。有。顯。於。時。性。行。學。術。人。罕。知。余。故。不。自。已。於。

悲而狀其實焉。弟諱先恭字禮吾。生數齡。伯仲兄相繼卒。贈君於是心意灰絕。命先謙教弟。而愛憐特甚。有不稱意。撫之而悲。謂先謙曰。第婉導之。是佳兒。當率教。不見汝兩兄學成死耶。成祖宗澤也。不成天也。我腸寸斷矣。又數年。贈君卒。易簀時。詔先謙曰。好撫弟。毋辱先人。已而家益貧。余投筆走江湖。弟就外傅。嗣是數歸。數出遊。而弟之學業。僅歸時一課之。已日月異。未嘗待余督責也。又久之。歸見所學。爲論事之文。皆有章法。古近體詩。差不俗。問之。悉無師承。余間摘其疵。辭不待畢而已。達也。丙寅歲。余假歸。則弟已縣府試。前列補縣學生。其

師友皆稱爲好學及余己已歸弟詩文日益進閒爲小
詞輒工讀書批卻導窾領悟殊捷著述積盈尺矣以余
初度日醺酒烹猪羊聚家人飲極歡弟起奉觴爲母壽
而顧余曰昔司馬子長歷覽名山大川爲文卓犖有奇
氣蘇頲濱患其文不昌見秦岱黃河歐陽公以自壯弟
生二十一年矣生平豪宕自喜跼蹐鄉曲閒環視罕當
意者懼吾自此志趣卑陋而文益窮也將從兄泝瀟湘
登衡岳南踰五嶺浮海而北遊京師文章之林周覽天
下形勢阨塞泛乎洞庭而歸吾廬旣以請於吾母兄其
許我乎余笑曰諾遂偕至郴入樂昌界將下瀧夜剪燭

讀昌黎瀧吏詩家人以吾母憂思故走書命歸余遂送
弟返而獨行迨還自雲南弟已嬰疾數月百藥而竟不
愈矣弟性剛氣盛好面折人見作僞者疾若仇持家整
肅聞僕婢聚語嬉笑必痛斥盛怒不可解時母至則垂
手侍片言卽釋見人急難赴之如已事施濟無慳邇年
立功過格行之不倦旣不求合於俗亦不爲俗所與余
每歸形影相逐愛聞說山水奇險可喜愕處以爲快旣
出門爲詩益多好句歸自樂昌送余行哭失聲病革出
殘稿付余曰吾家自六世祖以下六代九人所著述積
一匱弟懼殘佚手鈔且半今併第十矣悉以累兄幸爲

弟條理足成之死不朽嗚呼慟哉以弟之剛直不回穎悟好學所至胡可量余歸三閱月弟始病甚以死初歸時弟病猶未必不可爲而坐視其展轉顛倒於庸醫之手而莫知所拯是余所重負罪於先贈君而流慟而自搗者也弟歿逾一歲而余困窮孤陋已如是則異日哭弟以自哭者終古未有窮期也弟卒於同治十年三月二十九日年二十三附葬瀏陽門外趙家山由附貢生以貲入爲同知候選改分發補用知府生三歲爲二伯父直清公後名後父母皆前卒妻張氏淑人後弟沒五十餘日以身殉女一肇祖同治十一年壬申十月同懷

兄先謙謹狀